

ADYAYA I

PURWAKA

1.1 DADALAN PIKOBET

Aksara Bali nenten sida lempas ring panglimbak aksara saking India, santukan panglimbak agama Hindu miwah Buddha ring panegara Indonesia, taler rauh ring Bali kasarengin antuk basa miwah aksarannyane, Disbud Bali (2002:4). Ring panegara India wenten aksara sane kawastanin aksara Karosti. Saking aksara Karosti puniki nglimbak dados aksara Brahmi. Mawit saking aksara Brahmi puniki nglimbak dados aksara Dewanegari miwah aksara Pallawa. Aksara Dewanegari kaanggen ring India Utara sajeroning nyurat basa Sanskerta. Aksara Pallawa kaanggen ring India Selatan sajeroning nyurat basa Pallawa. Mawit saking panglimbak aksara Dewanegari miwah Pallawa puniki ngametuang aksara Kawi utawi aksara Indonesia Kuna. Saking aksara Kawi puniki kasuen-suen mauah dados aksara Jawi miwah aksara Bali, taler dados aksara-aksara tiosan sane mangkin wenten ring Indonesia. Ring Bali panglimbak aksara Dewanegari miwah aksara Pallawa kakeniang ring Pura Penataran Sasih Pejeng, Kecamatan Tampaksiring, Kabupaten Gianyar.

Aksara salanturnyane sane nglimbak wantah aksara Pallawa. Pinaka cihnannyane kakeniang sesuratan aksara Pallawa sane kawastanin aksara Semi Pallawa. Mawit saking aksara Semi Pallawa puniki ngraris nglimbak

wangunnyane dados aksara Kediri Kwadrat, miwah dados aksara Jawi rauhing dados aksara Bali. Sesuratan aksara Pallawa puniki minakadinnyane wenten kakeniang ring Pura Bale Agung Sembiran. Wangun aksara Bali gumanti bunteran, puniki wantah cihnannyane wangun aksara Bali mawit saking sesuratan aksara Pallawa.

Basa Bali pinaka dasar budaya Bali lan nglimbakang budaya nasional, mawinan sakadi punika, basa Bali patut lestariang riantukan basa Bali punika mapaiketan sareng kawentenan adat, budaya, lan *tradisiring* Bali. Basa Bali sane dahat mabuat sajeroning nglimbakang budaya Bali taler sampun kauratiangolih Pemerintah Daerah Tingkat 1 Bali. Indike puniki kasinahang antuk pidabdab pemerintah sajeroning ngupapira tur nglimbakang basa, aksara, lan sastra Bali majalaran antuk ngamedalang *Peraturan Daerah No. 3 Tahun 1992* ngenenin indik Basa, Aksara, lan Sastra Bali (Lembaran Daerah Propinsi Daerah Tingkat 1 Bali, Tahun 1992 Nomor 385 Seri D Nomor 3799), Disbud Bali (1996:1).

Pidabdab mangda basa, aksara lan sastra Baline sida tumbuh werdi sampun makeh pisan kamargiang. Ngawit saking warsa 1957 sampun kawentenang Pasamuhan Agung Basa Bali kapertama, raris kalanturang antuk Pasamuhan Agung Kecil warsa 1963, Warsa 1973 kamargiang Pasamuhan Agung II, kalanturang malih Pasamuhan Agung Basa Bali III duk warsa 1991. Sane pinih untat duk warsa 1996 kawentenan Pasamuhan Agung Basa Bali IV sane kawastanin taler *kongres Bahasa Bali IV*, Disbud Bali (2002:1).

Duk warsa 1996, Dinas Kebudayaan Propinsi Bali nglanturang *Surat Edaran Pemerintah Daerah Propinsi Bali No. 01/1995* indik pangapti panuntunan aksara, basa miwah susastra Bali saha prasida ngamedalang buku sane mamurda

Pedoman Penulisan Papan Nama dengan Aksara Bali, Suwija (2014:8). Buku puniki wantah buku ancengsane pinih anyar pinaka sepat siku-siku utamane ring sesuratan *papan nama* maaksara Bali.

Utsaha sane sampun kalaksanayang antuk ngamedalang *Pergub* maka miwah *Perda* utamane indik aksara Bali punika dahat mabuat antuk krama Bali pinaka silih tunggil usaha saking pemerintah nguripang budaya aksara Bali. Krana ring aab jagat sakadi mangkin sane kabaos aor tanpawates sampun akidik sane uning ring aksara Bali napi malih nyurat saha prasida nampenin kaiwangan utawi kalewihan sesuratan sane kari wenten ring makudang-kudang genah lan cakepan maaksara Bali sane banget mawiguna ring kahuripan. Antuk punika sampun sapatutne ngaturang parama suksma majeng ring pemerintah krana sampun tetep urati ngawit warsa 1992 nyantos mangkin sampun mausaha ngupapira tur nglimbakang basa, aksara, lan sastra Bali majalaran antuk ngamedalang *Peraturan Gubernur* miwah *Peraturan Daerah*.

Akeh pikobet sane wenten duk warsa 1992 mawinannenten anut pantaraning usaha-usaha saking pemerintah lan panyanggra saking krama antuk ngajegang budaya Bali. Pamargi saking pemerintah nenten prasida becik kasanggra olih krama Bali,krana kawatesin kawentenan sarana komunikasi sane mawinan pakeling utawi pamargi saking pemerintah nenten kauningin olih krama. Pemerintah taler kirang sumekenantuk kawentenan uger-uger mangda samian krama sane mapaiketan ngamargiang pakeling sane sampun kamedalang.Akehan krama taler nenten urati antuk pangapti saking pemerintah mangda prasida sareng-sareng nyaga lan ngupapira basa, aksara lan sastra Bali. Taler sane banget meweh katepasin santukan ius *Globalisasi* lan *Pariwisata* sane dahat naut manah para

krama kaanggen ngrereh pangupa jiwa nyantos seleg malajahin budaya asing lan lali antuk ngajegang budaya Bali.

Basa, aksara lan sastra Balipinaka silih sinunggil kabudayaan daerah lan pahan saking budaya nasional, sane banget ngawinang nincap kawibawanwangsa Indonesia. Basa daerah wantah basa sane kawigunayang duk dumun ngantos mangkin ring wewidangan palemahan panagara Indonesia. Kawentenan sastra daerah wantah reriptaan sane madaging papineh sane utamaring kahuripan, sane lengut kabaosang ngangge basa daerah. Punika taler aksara daerah pinaka *sistem ortografi* pikolih para janane ring daerah sane ngawidangin aksara lan tata cara *pengaksaraan* kaanggen nyurat basa daerah. Panegara Indonesia banget nyugjugang lan nitenin kawentenan basa, aksara lan sastra Bali pinaka druen kabudayaan Nasional sane patut kamanggehang lan kalimbakang.

Utsaha antuk nitenin, nglimbakang, nganggen lan malajahin kawentenan basa, aksara lan sastra Bali patut satata kawangun antuk ngwetuang pamargi sane patut manut tatujon sane kasurat ring *Peraturan Daerah*. Duaning *Peraturan Daerah Bali No. 3 tahun 1992* indik basa, aksara lan sastra Bali punika wantah sampun nenten anut ring panglimbak hukum lan pakibeh jagat, punika mawinan patut kagentosin antuk ngwentuk miwah ngardi awig sane anyar makadi *Peraturan Daerah* Propinsi Bali ngenenin indik Basa, Aksara lan Sastra Bali sane anyar nganutin panglimbak aab jagat, *Perda Bali (2018)*.

Utsaha nglestariang kawentenan Basa, Aksara lan Sastra Bali punika taler sampun kauratiang olih Gubernur Bali sane pinih anyar warsa 2018 malarapan antuk ngamedalang “*Pergub Bali No 80 Tahun 2018*” indik ngrajegang lan nganggen basa, aksara lan sastra Bali taler ngawentenang bulan basa Bali nyabran

warsa ring bulan Pebruari. Sangkaning pamutus *Pergub* ring ajeng, sane banget ngawinangkrama ring Bali utamannyane eling ring aksara Bali wantah kapatutan sane kasurat manut ring adiaya kapingpat (4), paos kapingnem (6), ayat (1) : aksara Bali patut kagenahang luhuran saking aksara latin ring sesuratan *papan nama* sane kaepah dados sia. Genah ipun inggih punika : (a) genah parahyangan krama Hindu, (b) *lembaga* adat, (c) prasasti *peresmian gedung*, (d) *gedung*, (e) *lembaga* pemerintah, (f) *lembaga swasta*, (g) *jalan*, (h) *sarana pariwisata*, (i) *fasilitas umum lainnya*.

Sane pinih mabuat taler sampun kamargiang pinaka usaha olih makudang-kudang Desa adat, lembaga pendidikan, lan krama ring Bali ngenenin indik nglaksanayang *Bulan Bahasa Bali*. Minakadi sane ngranjing ring *Pergub* adiaya kaping lima (5), inggih punika :

“*Penyelenggaraan Bulan Bahasa Bali, Pasal (7), ayat (1) : bulan bahasa Bali diselenggarakan pada setiap bulan Pebruari, (2) Bulan Bahasa Bali sebagaimana dimaksud pada ayat 1, diselenggarakan oleh Pemerintah Propinsi berkoordinasi dengan Pemerintah Kabupaten / Kota, (3) Bulan Bahasa Bali dapat diselenggarakan oleh Desa Adat, lembaga pendidikan, swasta dan / atau Masyarakat. Pasal 8 ayat (1) Bulan Bahasa Bali sebagaimana dimaksud dalam Pasal 7 ayat (1) diselenggarakan dalam bentuk kegiatan festival, lomba, pameran, pertunjukan, seminar dan kegiatan lainnya yang relevan dengan melibatkan masyarakat, ayat (2) Seluruh penyelenggaraan dan peserta kegiatan sebagaimana dimaksud pada ayat (1) menggunakan Bahasa Bali.*”

Majalaran antuk napi sane kabaosang ring Adiaya kaping (6), paos kaping (11) ; lembaga punika sane patut nglaksanayang, nureksain lan ngwentenang pasamuhan alit miwahagung inggihan sapisira sane patut kaicen *penghargaan/ hadiah* yening sampun prasida nglimbakang basa, aksaralan sastra ring Bali, napi malih pikolihnyane ngantos satus yuta, sakadi sane sampun kasurat ring adiaya

kaping (7). Kawentenan panglimbak basa, aksara lan sastra Bali puniki pemerintah Propinsi taler nyarengang pemerintah Kabupaten pinaka ngwantu Propinsi ritakala ngamargiang *program* inucap. Napimalih sahananing prabea sane metu saking *program* puniki sampun kaprabeain antuk *Anggaran Pendapatan dan Belanja Daerah (APBD) Propinsi dan sumbangan lain yang sah dan tidak mengikat*, minakadi sane kasurat ring Adiaya kaping (9) indik prabea.

Cihna kasumekean antuk napi sane karincikang lan kamargiang olih pemerintah sampun patut, ngawinang para jana lan sujana ring Bali nincap uratiannyane ring kawentenan basa, aksara lan sastra Bali. Panglimbak *Pergub* Bali warsa 2018 punika sampun kacihnayang antuk makudang-kudang wewidangan Desa Adat, *lembaga Pendidikan* lan kramaring Bali sampun ngamargiang makudang-kudang *programsakadi festival, lomba-lomba, pameran, pertunjukan, seminar* miwah sane tiosan sane mapaketan ring Basa, aksara lan sastra Bali tur pamiletnyane sampun makeh. Manut Gubernur Bali I Wayan Koster maosang ; *"Itu bagian dari pada kita menjaga Bali memelihara identitas Bali"*. Indik napi sane sampun kabaosang olih Gubernur Bali, mawinan dane ngrincikang inggihan *Pergub No. 80 Tahun 2018* sane mapaketan sareng basa, aksara miwah sastra Bali. Punika wantah pinaka silih tunggil usaha ngrajegang Budaya Bali.

Majalaran antuk kawentenan *Pergub* punika, krama sampun makinkin ngamargiang *peraturan* antuk makarya *papan nama* ring soang-soang genah utama ring Bali minakadi *Airport Ngurah Rai Denpasar, Kantor Gubernur Bali, Kantor Bupati, Kantor Camat, Kantor Prebikel, Gedung, sekolah* miwah akeh *instansi-instansi* sane tiosan taler sampun nguratiang pamargi saking Gubernur

antuk makarya *papan nama* anyar utawi ngentosin sane sampun wenten antuk sesuratan sane nganutin *Pergub* Bali. Punika nyihnayang krama ring Bali utamanyane sampun nglaksanayang napi sane kaaptiang olih Pemerintah antuk sareng-sareng ngwerdiang budaya Bali sane luh utama.

Tios ring punika taler kari akeh wenten pikobet-pikobet sane patut katepasin, krama kawentenane pamargi sane durung anut pinaka pangapti pemerintah lan krama Bali. Akeh instansi sane durung ngaryanin *papan nama* utawi ngentosin sesuratan *papan nama* sane durung patut antuk sesuratan nganutin uger-uger pasang aksara Bali ring *papan nama* sane patut. Napi malih ring desa-desa utamane ring wewidangan Kecamatan Tejakula, Kabupaten Buleleng, kari wenten sane durung ngamargiang uger-uger punika, taler kari akeh kaiwangan-kaiwangan sane wenten ring sesuratan pasang aksara taler ring pasang pageh sakadi ring sesuratan angka sane patut kaapit antuk carik, sesuratan aksara anceng sane durung manut, genah sesuratan aksara Bali sane durung kagentosin, miwah akeh kaiwangan-kaiwangan sane tiosan. Wenten makudang-kudang pikobet sane ngardi kawentenane punika, sakadi kekurangan pangresep saking krama antuk kawentenane *Pergub*, krama kirang tatas ri sajeroning aksara Bali sane patut, taler kawentenane krama sane nenten urati ring kawentenane punika. Sane banget dados pikobet inggihan kawentenane *buku pedoman* sesuratan *papan nama* sane pinih anyar durung anut kaanggen sepat siku-siku panuntun krama ngamargiang kawentenane punika. Punika dados pikobet sane banget meweh pacang katepasin mawinan nenten akeh sane uning yening kari wenten kaiwangan-kaiwangan ri sajeroning sesuratan aksara Bali.

Manut napi sane sampun katlatarang ring ajeng, panilik meled nilikin sapunapi panyanggra krama ring Kecamatan Tejakula Kabupaten Buleleng indik kawentenan *Pergub No. 80 Tahun 2018* indik basa, aksara lan sastra Bali utamane ring sesuratan *papan nama* maaksara Bali. Panilik meled nilikin tetilikan puniki mawinan akeh sesuratan aksara Bali ring *papan nama* sane kari iwang, taler kari wenten pikobet-pikobet sane lianan sane patut katepasin mangda prasida ngamolihang pamargi sane patut antuk iraga sareng-sareng nyaga miwah nglestariang tetamian panglingsir pinaka budaya Bali utamane indik aksara Bali.

Tetilikan puniki boya ja sane kapertama ngenenin indik sesuratan Pasang Aksara Bali. Tetilikan sane pateh sampun naanin kalaksanayang sadurungnyane, olih Ni Luh Putu Mei Aryantini (2016) sane nilikin indik Nureksain Sesuratan Pasang Aksara Bali ring Sajeroning Papan Wasta sane Wenten ring SD se-kecamatan Jembrana. Tetilikan sane kalaksanayang olih Ni Luh Putu Mei Aryantini puniki nilikin indik kaiwangan sesuratan *papan nama* sane wenten ring SD se-Kecamatan Jembrana.

Antuk makudang-kudang pikobet sakadi sane sampun katlatarang punika lan medalnyane *Peraturan Gubernur No 80 Tahun 2018* indik *Perlindungan dan Penggunaan Bahasa, Aksara dan Sastra Bali*, Utamanae ring Adiaya kaping pat *Paos 6* sane madaging indik panyuratan aksara Baliring *papan nama* mawinan kadaut manah titiang antuk ngambil tetilikan sane mamurda **“Panyanggra Krama Kecamatan Tejakula, Kabupaten Buleleng ring kawentenan *Pergub Bali No.80 Tahun 2018* Utamane Indik *Papan Nama* Maaksara Bali”**.

1.2 NGREREH PIKOBET

Sajeroning tetilikan puniki sane jagi kalaksanayang panilik inggih punika ngrereh makudang-kudang pikobet sane sampun katelatarang ring ajeng. Pikobet-pikobet sane sampun kapanggih ring kawentenan *Pergub Bali No. 80 Tahun 2018* ngenenin indik Basa aksara lan sastra Bali inggih punika; (1) Napike krama sampun uning ring kawentenan *Pergub Bali Tahun 2018* puniki, (2) Sapunapi panyanggra krama ring kawentenan *Pergub Bali*, (3) sapunapi cihna ring kawentenan *Pergub Bali* sampun becik kalaksanayang, (4) ri sajeroning ngamargiang bulan basa Bali, napike sampun anut sakadi sane munggah ring *Pergub Bali*, (5) Sapunapi pikobet miwah panampen krama ngamargiang *Bulan Bahasa Bali* sane kalaksanayang ring bulan pebruari, (6) Sapunapi panyanggra krama antuk kawentenan *Pergub* utamane ring sesuratan *papan nama*, napi sampun ngmargiang utawi durung, (7) ritakala nyurat *papan nama* napike sampun sesuratannyane ninutin uger-uger pasang aksara Bali miwah (8) napike wenten kaiwangan panyuratan *papan nama* ring *instansimiwah* sekolah sejobag Kecamatan Tejakula.

1.3 NGWATESIN PIKOBET

Sajeroning ngrereh pikobet sane sampun katlatarang ring ajeng, panilik ngwatesin pikobet sane katilikin inggih punika ngrereh kaiwangan-kaiwangan ring sajeroning *papan nama* wantah ring wewidangan kec. Tejakula, taler sane katilikin wantah ring *instansiresmimiwah* sekolah. Pikobet punika kawatesin mawinan panilik kabanda antuk galah lan mangda prasida paripurna sajeroning nepasin pikobet tetilikan. Pikobet sane kawatesin inggih punika (1) panyanggra krama ring Kecamatan Tejakula indik kawentenan *Pergub Bali No.80 Tahun 2018*

ngenenin *papan nama* maaksara Bali, (2) indik kaiwangan panyuratan *papan nama* ring *instansi* miwah sekolah sejobag Kecamatan Tejakula. Pikobet sane jagi kabahbahang wenten ri sajeroning bantang pikobet ring sor puniki.

1.4 BANTANG PIKOBET

Malarapan antuk dadalan pikobet sane sampun kabaosang ring arep, prasida kaambil bantang pikobet sane jagi katilikin ring tetilikan puniki. Bantang pikobetyane inggih punika :

- a) Sapunapi panyanggra krama ring Kecamatan Tejakula indik kawentenn *Pergub* Bali No.80 Tahun 2018 ngenenin *papan namamaaksara* Bali?
- b) Napike wenten kaiwangan panyuratan *papan nama* ring *instansi* miwah sekolah sejobag Kecamatan Tejakula ?

1.5 TETUJON TETILIKAN

Ring sajeroning tetilikan sane kalaksanayang pastika madue tetujon sane kakaryanin ri kala sampun usan nglaksanayang tetilikane punika, awinan tetujone punika sane pinaka sepat siku-siku ri kala ngawentenang tetilikan. Tetujon ring tetilikan sane mamurda, “Panyanggra Krama Kecamatan Tejakula, Kabupaten Buleleng ring kawentenan *Pergub* Bali No.80 Tahun 2018 Utamane Indik *Papan Nama* Maaksara Bali”. inggih punika :

- a) Prasida nlatarang panyanggra krama ring Kecamatan Tejakula indik kawentenn *Pergub* Bali No.80 Tahun 2018 ngenenin *papan nama* maaksara Bali.
- b) Prasida nlatarang kaiwangan panyuratan *papan nama* ring *instansi* miwah sekolah sejobag Kecamatan Tejakula.

1.6 KAWIGUNAN TETILIKAN

Tetilik puniki kaaptiang prasida mikolihang kawigunan sane becik tur prasida mawiguna. Silih sinunggil kawigunan tetilik puniki minakadi:

1.6.1 Kawigunan Panglimbak

Pikolih tetilik puniki kaaptiang prasida ngicen kawigunan ring para krama sami utamane ring Kecamatan Tejakula mangda sami uning ring *Pergub No. 80 Tahun 2018* saha prasida nglaksanayang miwah nelebin antuk nglestariang silih tunggil budaya Bali sane banget mabuat ngantos kawekas.

1.6.2 Kawigunan Pamucuk

a) Majeng ring krama Bali

Krama Bali mangda uning ring aksara Bali, utamane ngenenin indik sesuratan sane becik manut uger-uger pasang aksara Bali.

b) Majeng ring sang sane nyurat

Panyurat mangda kaanggen nincapang kaweruhan ri sajeroning sesuratan *papan nama* utamannyane ring uger-uger pasang aksara Bali sane patut.

c) Majeng ring panilik lianan

Panilik sane lianan mangda pikolih tetilikan punika prasida kauninggin taler kaanggen imba ring tetilikan asoroh salanturnyane mangdane sayan jangkep.